

CONVENIO DE COLABORACIÓN ENTRE A CONSELLERÍA DE SANIDADE E O CONCELLO DE FERROL PARA A INSERCIÓN DE PUBLICIDADE INSTITUCIONAL SOBRE A CAMPAÑA DE VACINACIÓN ANTIGRIPE 2018/19 EN DISTINTOS SOPORTES MUNICIPAIS DE FERROL.

En Santiago de Compostela, 25 de outubro de 2018.

REUNIDOS

Dunha parte, **D. Jesús Vázquez Almuiña**, conselleiro de Sanidade, no exercicio das facultades que lle veñen atribuídas no artigo 34 da Lei 1/1983, do 22 de febreiro, reguladora da Xunta e da súa Presidencia, e no Decreto 41/2013 do 21 de febreiro, polo que se establece a estrutura orgánica da Consellería de Sanidade e de conformidade co establecido na Lei 1/2016, do 18 de xaneiro, de transparencia e bo goberno, así como na Lei 40/2015, do 1 de outubro, do réxime xurídico do sector público.

Doutra parte, **D. Jorge Suárez Fernández**, actuando en nome e representación do Ferrol, en virtude da súa condición de Alcalde – Presidente da citada Corporación, segundo o disposto no artigo 21 da Lei 7/1985, do 2 de abril, reguladora das bases de réxime local, no artigo 61.1 da Lei 5/1997, do 22 de xullo, de administración local de Galicia, e no artigo 41.1 do Real decreto 2568/1986, do 28 de novembro, polo que se aproba o Regulamento de organización, funcionamento e réxime xurídico das entidades locais.

As partes intervenientes recoñécense capacidade xurídica para outorgar o presente convenio, e para iso,

EXPOÑEN

1. Que a Constitución no seu artigo 43 recoñece o dereito á protección da saúde.
2. Que o artigo 6 da Lei 14/1986, do 25 de abril, xeral de sanidade, establece que as actuacións das administracións públicas orientaranse a, entre outras, a promoción da saúde, a promover o interese individual, familiar e social pola saúde mediante a axeitada educación sanitaria da poboación e a garantir que cantas accións sanitarias se desenvolvan estean orientadas á prevención de enfermidades e non só á súa curación.
3. A gripe continúa sendo unha enfermidade moi frecuente a nivel mundial, que se transmite moi facilmente e que, aínda que na maioría dos casos non deixa secuelas, pode ser grave e mortal, especialmente nalgúns grupos, tales como as persoas maiores, mulleres embarazadas e as persoas con certas condicións médicas crónicas. Por este motivo, anualmente dende 1991 a Consellería de Sanidade, a través da Dirección Xeral de Saúde Pública e do Servizo Galego de Saúde, leva a cabo a campaña de vacinación antigripal, que nos seus inicios abarcaba as persoas de 65 ou máis anos e que dende o ano 2010 se ampliou a todas as persoas de 60 ou máis anos.

A particularidade da vacina da gripe radica en que se reformula cada ano debido á variación constante dos virus gripais, co obxectivo de que concorden os virus incluídos na vacina cos circulantes. A vacinación anual é necesaria, porque a resposta inmune do organismo diminúe no prazo dun ano e porque os virus da gripe cambian a miúdo, polo que as cepas específicas da vacina son revisadas cada ano pola Organización Mundial da Saúde e actualizadas segundo sexa necesario, para que exista maior probabilidade de concordancia cos virus circulantes.

4. Que o obxectivo primordial desta campaña é ofertar a vacinación a todas as persoas incluídas nos grupos de risco de forma totalmente gratuíta, co fin de acadar unhas

coberturas axeitadas nesta poboación que reduzan a súa morbilidade e o impacto da enfermidade na comunidade, así como os custos socioeconómicos asociados ao seu padecemento. Por isto, a campaña vai dirixida fundamentalmente a protexer as persoas que teñen un maior risco de presentar complicacións e ás que poden transmitir a enfermidade a outras persoas de risco, así como ás persoas que pola súa ocupación proporcionan servizos esenciais na comunidade.

5. Que con esta campaña preténdese conseguir unha cobertura na poboación de 60 a 64 anos igual ou superior ao 35 % e na de 65 ou máis anos igual ou superior ao 65 %.

6. Que o Concello de Ferrol, en calidade de responsable final tanto dos Mupis, das Asociacións de Veciños e dos Centros Cívicos apoia a inserción de publicidade institucional sobre a campaña de vacinación antigripal 2018/2019 , facendo chegar deste xeito tanto ao conxunto da veciñanza coma aos/ás visitantes da súa área tanto administrativa como sanitaria, as bondades expostas no presente convenio.

A entidade quere aliñarse cos obxectivos da outra parte asinante expresados con anterioridade, e implicarse como axente colaborador na publicidade e difusión da campaña de vacinación antigripal 2018/19.

7. Conscientes da dita necesidade as partes intervenientes están interesadas en plasmar o seu compromiso de colaboración para acadar o obxectivo sinalado mediante a formalización deste convenio de colaboración de acordo coas seguintes

CLÁUSULAS

Primeira. *Obxecto*

O obxecto deste convenio é a inserción de publicidade institucional sobre a campaña de vacinación antigripal 2018/2019 nos Mupis do Concello de Ferrol (10 mupis), nas Asociacións de Veciños e nos Centros Cívicos do Concello co fin de conseguir aumentar a cobertura na poboación de 65 ou máis anos.

Segunda. *Natureza xurídica*

Este instrumento ten natureza de convenio de colaboración, quedando excluído da aplicación da lexislación da lexislación dos contratos administrativos, a tenor do disposto no artigo 6.2 da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014.

Terceira. *Compromiso das partes*

a) A Consellería de Sanidade comprométese a achegar o material publicitario (carteis) de acordo co deseño e contido que elabore a propia consellería, que remitirá ó Concello de Ferrol sen que para el supoña ningún custo adicional. O material remitido será para colocar en 10 Mupis e enviaranse 100 carteis para os Centros Cívicos e Asociacións de Veciños que o Concello de Ferrol repartirá segundo considere conveniente. Estes custos non superarán os 200 € e pagaranse con cargo á aplicación orzamentaria 1102.413A.640.4 dos orzamentos xerais da Comunidade Autónoma de Galicia para o ano 2018.

Así mesmo, a Consellería de Sanidade comprométese a manter ao Concello de Ferrol indemne de calquera reclamación que realice unha terceira persoa en relación á infracción ou violación dos dereitos de explotación de propiedade intelectual sobre os mencionados materiais publicitarios.

b) O Concello de Ferrol porá a disposición da Consellería de Sanidade para esta campaña unha localización para fixar os carteis nos Mupis, Centros Cívicos e Asociacións do Concello. Estes carteis sobre a campaña de vacinación antigripal 2018/2019 estarán expostos nos puntos mencionados ata o remate da campaña (29 de decembro 2018).

A publicidade acomodarse, en todo o seu contido e forma, ás disposicións vixentes no ámbito europeo, nacional, autonómico e municipal.

Cuarta. *Propiedade intelectual*

A propiedade intelectual derivada das accións precisas para a materialización do obxecto deste convenio estará suxeita ás disposicións legais vixentes na materia, en concreto, o Real decreto legislativo 1/1996, do 12 de abril, polo que se aproba o texto refundido da Lei de propiedade intelectual, e os artigos 53 e seguintes da Lei 2/2011, do 4 de marzo, de economía sostible.

Quinta. *Vixencia*

Este convenio estará vixente dende o día da súa sinatura ata o 29 de decembro de 2018.

Sexta. *Resolución anticipada*

Serán causas de resolución deste convenio:

1. O común acordo das partes asinantes, que se plasmará por escrito.
2. A imposibilidade, legal ou material, de dar cumprimento ás súas cláusulas.
3. Incumprimento total o parcial das cláusulas e obrigas establecidas neste convenio por calquera das partes que non sexa emendado no prazo de trinta (30) días seguintes á recepción da notificación escrita da parte que aprecie o incumprimento, identificando o dito incumprimento e reclamando a súa emenda.
4. A vulneración do deber de confidencialidade sobre os datos de carácter persoal ou de calquera outra obriga derivada da lexislación de protección de datos de carácter persoal.

Sétima. *Confidencialidade*

De conformidade co que se establece no Regulamento (UE) 2016/679 do Parlamento Europeo e do Consello do 27 de abril de 2016 relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE, e no Real decreto lei 5/2018, do 27 de xullo, de medidas urxentes para a adaptación do Dereito español á normativa da Unión Europea en materia de protección de datos, así como no resto de lexislación vixente nesta materia, as partes comprométense a gardar a máis estrita confidencialidade respecto de calquera das informacións, datos e documentación de carácter persoal á que teñan acceso en virtude deste convenio e ao deber de gardalos, sen que poidan utilizalos para usos diferentes aos previstos nel. Fan constar, de maneira expresa, que velarán polo cumprimento da normativa de protección de datos persoais de aplicación en cada caso.

Estas obrigas subsistirán incluso despois de finalizar as relacións negociais entre as partes.

Oitava. *Xurisdición*

Este convenio ten natureza administrativa. As dúbidas que poidan xurdir sobre a súa interpretación se resolverán de mutuo acordo entre as partes. Non obstante, no caso de persistencia do desacordo, corresponderá á xurisdición contencioso administrativa resolver as cuestións litixiosas que poidan xurdir da súa interpretación e cumprimento.

Novena. *Rexistro de convenios, transparencia e bo goberno*

A firma deste convenio de colaboración leva implícito o consentimento expreso das persoas intervenientes para que a Administración pública autonómica galega poida facer públicos os datos de carácter persoal que figuren nel, de acordo co disposto na Lei 19/2013, do 9 de decembro, de transparencia, acceso á información pública e bo goberno, e a Lei galega 1/2016, do 18 de xaneiro.

E para que así conste, firman o presente convenio, por triplicado exemplar e en todas as súas páxinas, no lugar e data que figuran na cabeceira.

Pola Consellería de Sanidade

Polo Concello de Ferrol

Asdo.: D. Jesús Vázquez Almuiña

Asdo.: D. Jorge Suárez Fernández